

四庫全書

集部

欽定四庫全書

宋元詩會卷四十四

兵部主事陳焯編

劉 燾

字晦伯建陽人乾道八年進士調山陽主簿通判
潭州未上丁艱時偽學禁起燾從朱熹講道武夷
築雲莊山房為終老之計調贛州坑冶書管文字
歷知德慶府提舉廣東常平遷尚左郎官國子司
業乞罷偽學之詔請以朱熹白鹿洞規頒示太學
兼編修檢討官進國子祭酒權工部尚書仍兼諭
德每講讀至經史所陳聲色嗜欲之戒懇切再三
進讀詩之說覽者為吐舌云卒贈光祿大夫謚文

送王子文宰昭武

二首

百鍊成績指粹白俄成緇有初諒非難其難在終之道
心眇絲粟易為羣物移不有專一功誰能勝安危願言
保令德歲晏以為期

平時州縣間上下意苦異善書肘後掣有志奚由遂子
今得所從展布有餘地兩賢更戮力萬物應吐氣相期
召杜功奕奕昭來世

上陳縣尹

舊尹龍熊負令名至今天日共清明案頭未有人稱屈
村裏全無吏敢行滿院茶香敲句穩一簾花影韻琴清
後來踵武誰其似又說陳公政有聲

金國賀正旦使人到闕錫宴紫宸殿

榆關玉塞靜無塵嘉定于今第四春兩國交馳通好使
八方同作太平人翠鼉鼓奏娛嘉客白獸樽浮賞諫臣
聖歷從茲天共遠年年玉帛會楓宸

瑞慶聖節應制

皇家卜世過周唐
天啓真人應運翔
抱日預占恭邸夢
飛龍曾報皖山祥
翠雲影外來金母
紅霧香中擁玉皇
樂府賦工無以祝
願將金鑑代珠囊

葉適

字正則永嘉人為文藻思英發擢淳熙五年進士
第二人授平江節度推官少保史浩薦於朝召之
不至改浙西提刑幹辦用執政龔茂良薦召為太
學正遷博士因輪對敷奏剴切上慘然久之除常
博兼實錄檢討會朱熹除兵部郎官未就職為侍
郎林栗所糾適上疏力爭不報光宗嗣位出知蘄

州入為尚書郎官是時帝以疾不朝重華宮適力
言父子天性浮疑私畏何得阻定省之歡帝因兩
詣重華都人大悅孝宗崩光宗不能執喪其內禪
寧宗適與趙汝愚實主始謀焉寧宗立韓侂胄冀
得節鉞適勸趙汝愚當與之汝愚不聽適歎曰禍
自此始矣遂求補外未幾亦為御史所糾罷主宮
觀起判湖南轉運歷知泉州召權兵侍而侂胄欲
立功固位將啟兵端欲藉適草詔以動中外特兼
直學士適引疾力辭侂胄軍敗除適知建康府兼
沿江制置適經理堡寨漸有成績及侂胄已誅中
丞雷孝友劾適附侂
胄罷歸卒年七十四

靈巖

穹隆右俛眉天平左垂鬢吳人宅沮洳茲山抑其鎮陡

起為表著突兀數尋仞樛松頗堅瘦立石乃榮潤兼有
千里陂杳靄來遠韻宜乎登椒丘擺落思奮迅吳主未
亡時絕色館孤峻歌聲妙歛乃俎品窮蛤蜊蜃援琴固停
晷解甲仍轉瞬終歸寂寞人破釜煮枯葦陳迹不足弔
新締何勞問

北齋

人情無終極匪陋則求佳寢處既少安遊燕豈不懷惟
思舊酒務糟酵荒榛埋破瓶聚隆垤新甃連長堦種竹

夾超然移花遶北齋及爾風露清忽感意象諧幽深容
浪蘂潤澤長芳萼亭亭兩高梧買自婁門街俟以歲屢
寒宵若萬仞崖吾留能幾日齷齪強安排方嫌樹影瘦
復慮地勢低世間香味悅每與腥羶偕雅故使鄭清法
語仍進能俯同侪儒笑但恐好惡乖莫窮有限物徇此
未腐骸

張氏東園送王恭父得殿字

燕鴻不相須進趨自求便余來君其館乃復當我餞一

春三月雨亭樹鬱霧澱絮重厄飛揚花薦堆紫茜縱有
百壺清何能一笑遣為郎昔同甲四海初會面凜然抱
英特霜宇搏溫霏雄詞推落筆一語不可選重來更純
粹玉琢金就鍊漢家闡道術四達詔羣彥談經石渠觀
會議白虎殿通方要歸宿立異豈夸衒子行若微罪天
意委深眷以其今固辭可信非始戀楚熱宜縑絺峽漲
難短牽回舟泊書林及此未掩卷

奉賦德修西充大夫成都新園詠歸堂

浣花炫春滢濯錦絢晴浦成都信繁會此水工媚嫵豈
無濠上亭蹙步難仰俯誓言違市朝卜宅近幽阻沃沃
葵莧畦焰焰棠杏塢朝曦溼淺瀨暮色生遠渚循涯詠
未厭引流絡其圃蘋荇依籬樊鳬雁宿庭戶長松百里
外物象爭渺莽時平乏隱淪蓑笠自歌舞岷江志東向
激射走吳楚胡為滯淫之習坎聖所許

宿石門

好溪瀉百壑南北傾萬峰山凡堆阜俗映岸羞為容石

門忽秀出老幹蔭渟洪捨舟從口入便已離塵中衆芳
拱窟宅環峒獻奇穠藤蘿異態度尺寸疑施功錦茵翠
織成照耀無春冬水行千丈高歎薄不可窮更有洗頭
盆雲深霧常封昔年謝康樂築居待其終繼作者丘裴
語言亦稱雄栖栖三羽衣日晏齋廚空來遊百世後歎
息騷人風

露星亭

斗杓點翠為此城四郊環拱來遙青知君欲覽衆山小

取塲磨就天上亭身心合於高處著萬象不語森湊泊
古今日色遞淺深志士可惜虛光陰

趙成父築亭上饒即用東里舊圃牘曰魚計

秦僑洛寓隨南公新條復欲無開封亭名若有土斷法
鄭圃豈在章泉中舊魚遙應化龍去今魚且復波間住
人為魚計魚不知今樂莫忘昔日悲

題鄭大惠詩卷

憶從草廬赴鄰炊蒞雪攪筵糟涌糜要當醺酣活膚湊

不許雕刻妨肝脾何年兒生錦襖裂金塗門扉玉為切
吟中得眼萬象通浪吹狂歌總休歇兩家至今住連牆
讀書聞鷄夜相將經明先入韋平室句好還升李杜堂

送鄭丈赴建寧

清廟圖書寶熙朝雅頌音頻繁三節召荏苒二毛侵衣
食家纔足丘園意亦深臥聽牀下士時作武侯吟

送鄧諫從制幹

援引亦未力聲名空復傳終攜太平策還上蜀江船帆

色挂曉月槽音穿夕煙滄波不盡興收拾浣花邊

送謝希孟

白頭超幕府蚤已負平生未放鵬舒翼應須驥斂程驛
梅催凍藥柁雨送春聲為語常平使開懷待子荆

送包通判兼寄滕李度

風雨逍遙地衙排印簾新鈿車分路濶寶瑟聽歌頻燈
市曉侵月花田晚占春卻過張翰宅方信有閒人

贈盧次夔

家住東郊深能詩人共尋冰梭間道錦玉軫斷文琴城
漏宵添滴牕花晝減陰新涼白頭句清甚費悲吟

施翔公掌教長沙

著蔡義前識簫韶舜後音追回賈誼貶喚起屈原沈湘
水汀烟濶梅花署雪深余行陳迹久因子一微吟

西山

對面吳橋港西山幾一家有林皆橘樹無水不荷花竹
下晴垂釣松間雨試茶更瞻東序綵空翠落朝霞

送曹器遠

曹子苦心懷百憂古人遠矣思同流平生未得雄豪力
今日便甯卑微休麻源洞裏瓊葉雨南草市上蘆花秋
十年老語為誰了西望滄江空白頭

送潘德久

每攜瘦竹身長隱忽引文藤令頗嚴聞道將軍如卻穀
不妨幕府有陶潛江當濶處水新漲春到極頭花倍添
未有羽書吟自好全提白下入詩奩

陳藻

字元潔福唐人綱軒林亦之高弟也綱軒固貧而元潔之貧尤甚居無片瓦諸學子聚館俸為買田數畝輒被人奪去僑居福清縣之橫塘忍饑餓誼誦泊如也因以樂自名其軒所著有樂軒集

姚晉卿溪閣行

南院觀溪心已清縈紆更上閣中行西橫車馬市橋合
東眺遠山霞霧生日斜沙石淺可數半夜轟雷驅猛雨
農圃嘈嘈春水多誰得身閒延客歌醉後下堦齊拍手
長株矮樹排花柳主人更要雙眸寬去年拄杖尋長安

一行一處狂呼去日日芳園大如許買地此多直幾金
千屏萬障為墻堵

丹井懷叔達

喜稱吾子賦羞道少年時別去休論易愁來欲寄詩夕
陽書不到殘月夢相隨晚歲傷心事松嶺獨語誰

歸入古田界作

步入溪山勝橋亭古劒風土宜歸荔子村塢盡油桐南
店炊初滑西舟石漸窮豈知旬日外便訪去時蹤

虎溪

四圍山木合百磴屋簷重古穴成幽井疎林散曉峰響
泉那更月啼鳥此無冬臺上朝朝看天邊有怪松

自題海漁亭

二首

波濤生長處土地屬東隅樹樹縣漁網村村叫鷓鴣酒
旗孤嶼見書卷一山無欲趁鷄豚社因慚身業儒
屋舍高低住比鄰活計同簞簞嫌月白螃蟹要霜紅吠
犬隨村落賣魚成老翁地鹹耕種少海熟抵年豐

海口吟

按圖自古無人到二百年來戶口添
架屋上山成市井
張官近海課魚鹽
估客趁潮撐米入
沒人忍凍采蠔粘
仲尼有廟塵誰掃
寺觀崢嶸香火嚴

題融州城樓

除卻譙樓環解舍
蕭條市井客懷悲
高高下下山無數
淺淺深深江有時
大布紅裙徭女著
半規白扇野人持
城中昨夜亡羊豕
聞得誰家虎入籬

客中書事

千載蠻風尚有存
此來聞見不堪論
豬膏澤髮湘南婦
牛渤塗門嶺右村
行客下牀調瘴藥
吏人捉甕灌蔬園
豈無佳麗堪娛目
別有淒涼只斷魂

真仙洞

洞裏清溪可汎舟
入觀洞府出高丘
老聃尸解今還在
黃帝生前有此不
滴乳解添無數
幻攜燈何用不曾幽
乾坤自大人身小
拳石空中作勝遊

城山

雲霧成佳景
天明又幾回
忽攜詩句入
別放畫圖開
遠樹沈如立
行歌去似來
小船衝雨過
高柳接湖栽
月傷孤青樹
名呼怪石臺
故園無夢想
近擬築岵隈

夜宿延平水東

浮橋暫折阻
狂瀾懶問津
船趨往還雙
劒廟前酤酒醉
水西燈火水東看

戲題宏仲飲亭酒肆

老去雖貧有酒壚
秫田親種暫時沽
閨中不解為慳婦
閒問劉郎燕客無

盧北山元夕

社屋相忘鼓笛鳴
空村步月興堪乘
何須更要鰲山立
野燒天邊勝著燈

送黃欽之赴廣州鹽稅

地氣周遭逐處流
五羊漸已似中州
海風吹斷山無瘴
炎月何妨作宦遊

陳傳良

字君舉溫州瑞安人初患科舉程文之弊思有以矯之其為文章自成一家遂以文名擅當世及入太學與張栻呂祖謙友善東萊為言本朝文獻之序南軒則益以主敬集義之功自是四方受業者愈衆登進士甲科教授泰州用薦改太學錄通判福州為豪強所中罷官凡五年起知桂陽軍光宗立稍遷提舉常平轉運判官轉浙西提點刑獄召為吏部員外郎去朝四十年至是始歸鬚髮盡白都人聚觀嗟歎號陳老郎中因輪對首以寬民力為言帝嘉納且勞之曰卿昔安在不見久矣其所著書示朕退而上周禮說十三篇推秘監歷檢討實錄起居中書舍人會光宗不朝重華傳良力諫帝將徙之及出至御屏皇后挽帝回傳良遂趨上引裾后叱之傳良哭於廷后益怒傳良下殿徑

行改修撰不受寧宗即位召為直院詔與朱熹在外宮觀傳良執奏繳還詞頭為中丞謝溪所劾出提舉興國宮嘉泰二年進寶謨閣待制終于家年六十七謚文節其著述有詩解詰周禮說春秋後傳等書

遊白石巖

地向東南傾石際滄海立蛟鼉限波濤鷄犬得城邑居然通國望跋莫他山及道人獨有之置屋三四級幾看星月爛卻聽風雨急于今二百年我共冥鴻集晤語夕陽低對酒秋旻溼

送葉正則赴浙西憲幕

頻年送行客酒罄詩不工
最晚與君別奈此百感叢
岐山有鳴鳳雅頌移幽風
于時二老生出處海上同
曹劉對七箸失色一語中
明朝蜀江水不與灞滄通
人心起毫末世故關鴻濛
乃知貧賤交不下王霸功
霜根宿病驪雲帆背蜚鴻
秋水能隔人白蘋况連空
相從自束髮各去隨轉蓬
今懷欣有合後會苦未重
鱸魚直萬錢羊酪倍一鍾
願君養盛年我友半已翁

借書一首別薛子長

曲阿著柴扉陋甚誰盤桓美人此何求巨竹數十竿日
閱書百篇尚覺目力寬欲從我借書我書何足觀辛勤
抱遺經及此鬢髮斑一語未領會累日不自安雖更聖
人手亦恐衆說漫况復秦漢下曾莫修與刪致之獲麟
前存者今若干我無所取裁望洋久空歎讀書固匪易
窮理良獨難昨夜荷堤上嘗試及孟韓此語如涓埃此
道如丘山

張漕行部過湘岸有作因次其韻

春晚得新霽草木日夜綠陽光初蔽虧野暝或單複美人浮湘波領此入蓬屋故放歸帆遲更呼漁火續窮探物精華盡付詩凡目憶昨欣晤對令我忘休沐劇談酒行希危坐兵衛肅相思正倚樓所寄忽累幅瑰辭買堪貧軼韻和難屬自從楚騷興悲些逮差玉後來數唐人欸乃巖隈宿世無梁昭明斯文又誰錄

送郭希呂

我門閉重重我徑阻且深梅花獨相依聊以慰我心
人從何來崎嶇自幽尋亦于琢冰中而和南風琴菜甲
尚可羹新筍足同斟不知歲已華歸興生霜砧欲別復
少住棲鳥歸月林客去鳥翔飛落花滿牆陰

送趙叔靜教授閩中

讀書須讀經學文須學古青衫故不換白髮早可數
我亦窶人子風雨蔽蓬戶胡為數相過夜話恒過午

簡友人

南去有五嶺北來有重湖
水清石益奇往往中州無在
昔宦遊者越若韓張徒胡然
自衡陽隻雁亦不徂

和張倅唐英詠梅

二首

種梅欲百畝垂老意未渝
有山在堂背有溪在庭除
我危坐中央花以寘坐隅
人固不可親花亦不可疎
花芳以養性花蔭以休影
更欲從旁謀種秫可半頃
衝寒時一觴我醉花獨醒
醉醒兩相忘久矣繫歸艇

春晚書懷奉簡陳益之

百舌喜太甚杜鵑恨何深
睨眄斯黃鸝律中宮之音物
情自不齊天運初無心道人獨領會杖藜立芳陰

讀范文正公神道碑有感佚事

武侯不可致蜀主造其廬公在衰經中乃上時政書維
時君臣定事與草昧殊出處千載同豈必名迹如行伍
拔大將寒饑得名儒推轂天下士百年用其餘生平慕
河汾未許王魏俱殷勤八司馬意獨何區區自古朋黨
論消復莽無期誰令羣疑亾韓富及有為惜哉公不見

功名止西陸

送謝希孟歸黃巖

四首

紛紛竹帛傳浩浩金石刻淪亡已無限存亦誰愛惜如
何伏羲氏文字二三畫姬孔豈不聖用以演周易

法令如牛毛斯鞅信手成簿書積丘山趙張眼愈明萬
人立下風國勢尊且榮未省三代前誰獨有此名

圭璧襲縑藉山龍飾衣裳不聞燧古初而興自虞唐毀
車崇騎射隸作篆籀藏至今人便之秦亦忽以亡

累觴以為歡班荆以為儀交際貴如此勿使至意虧頗
常怪小雅鹿鳴至魚麗賓主禮百拜六經似支離

送鮑清卿教授莆中

閩中豈不好莆中况多儒其山有丹荔其水有子魚艾
軒諸老生典則故所餘堂堂退傳門海內欲曳裾宦游
得此樂餞者酒滿車我亦勸君酒我意獨未舒嘗聞入
林獵不可背水漁背水漁尚可背時更崎嶇方今朝廷
尊紳笏日走趨官多豈勝記勢遠復易疎媒身衆所同

藉口誰不如奈何但溫飽去向天一隅平生拙自謀蓬
巷歲月除更事亦既熟畫此未必愚豈有服蒞蘭佩之
以瓊琚令人愛不見搔首空踟躕

夷門歌送修德還闕

萬古江入海吳蜀有不通不通誰使然人自為異同昔
在李孟錢士各懷土封靜言彼何尤亦各徇所忠恭惟
宋受命三姓皆朝宗斯文已百年名世纔數公眉山與
金陵奈何不相容大雅如關洛亦復互詆攻朋分文字

間禍起師友中四郊忽戎馬塵滿夷門宮往事已覆轍
後事如飄蓬一飯忘苦饑一褐忘苦冬身謀每不長王
事靡有終有客獨惻惻萬里興深衷相過話離合歷歷
繇熙豐我久世慮薄念之涕無從貧賤將安歸功名在
其逢有能用斯人可使百阻空西人不為西東人不為
東

送范憲東叔帥潼川

相從意氣豪相知鬢毛斑細說竟昨非淺斟始今歡每

懷吾黨多未救此世難一則琢冰雪再則紉芝蘭騷人
絕芳潔孰與風人寬

水仙花

江梅丈人行歲寒固天姿蠟梅微著色標致亦背時胡
然此柔嘉支本僅自持迺以平地尺氣與松篁夷粹然
金玉相承以翠羽儀獨立萬槁中冰膠雪垂垂水仙誰
強名相宜未相知刻畫近脂粉而況山谷詩吾聞抱太
和未易形似窺當其自英華造物且霽威平生恨剛褊未

老齒髮衰掇花寘膽瓶吾今得吾師

送同年林多益丞寧海

同里衣冠近濶疎同年齒髮多衰變美人宜在玉筍班
隱吏亦隨花雨縣有杭一葦逢迎可每食雙魚甘旨便
顧瞻周道竟何如善為身謀吾豈願清廟笙鏞濟濟陳
碧梧鸞鵠深深見由來盛事歲月晚誰到修途肝膽健
楊花吹水酒搖波一請加餐再無倦

赴桂陽道中喜晴書事

十日九雨垂垂雪馬僵僕病泥乘橈披衣闔戶得星月
耳根久與朝雞別熟睡八年謀未拙乞米作糜蒙被啜
客來午漏家僮出如今兒歎妻愁絕我縱喜晴心已折
可以藝麻多筍蕨苟有一丘吾計決奈何諸公廝役皆
豪傑尚愛春陵老元結

送宋國博叅議江東分韻得夜字前年上幸學一
時同舍今去略盡為之悵然

南門供帳江上亭北門觴酒湖邊榭兩年出餞略可數

往往行人半同舍憶昔翠華臨壁海儒先一日爭聲價
蘇君舌掉巫峽水楊君氣奪幽并夜黃君石斫不可轉
夫子居然古彛箚艾軒風流天下少獨奏咸韶無獲夏
黃梁未熟事如許白髮不生心亦怕古來賢俊多坎軻
道與世違胡足詫武皇好少臣已老孟子尊王君尚霸
嗟乎夫子幸遭時諸公滾滾皆流亞德尊不過五品薄
歲晚曾無一飯暇君恩豈必問湖海家事姑惟問桑稼
此行端可振頽俗令我短轅今欲駕

送沈元誠赴臨漳主簿

誰說鄉先進能無沈隱侯青衫今適越白髮竟依劉道
固為名累人當與命謀三台行漸近且勿問歸舟

和張孟阜歲旦韻

白髮朝看鏡青燈夜數更文章翰善宦名字誤浮生廢
學兒鼾睡安貧婦饁耕從今定逢吉吾已卜先庚

月夜書懷

二首

送客門初掩收書室更虛新篁高過瓦涼月下臨除婦

病纔扶杖兒饒或饋魚今朝吾已過莫問夜何如

道德吾何敢功名代有人蒼黃恒畏咎斑白總憂貧細
字書全廢深杯酒勿親靜言空自愛萬古亦泯泯

送鄭少卿景望知建寧

屏廢誠愚分牢愁更索居若逢知己問猶解課兒書地
僻門長閉年饑菜自鉏相望無一字不是故情疎

沈元誠歸自臨漳喜而奉寄

荔圃班班熟蠓房箇箇肥我雖緣此誤公亦為何歸吏

事生衣垢家山減帶圍不無華袞字卿月更光輝

村居

野衣農圃雜華髮弟兄同佚老便居僻貪閒喜命窮習
成杯酌少脫落語言工危坐看流景新萌又落紅

牡丹和潘養大韻

看花喜極翻愁人京洛久矣為黃塵還知姚魏輩何在
但有歐蔡名不泯夕陽為我作初霽佳節過此無多春
更燒銀燭飲花露五陵佳氣今方新

湖樓送客即事

誰家喧騎盡朋簪，屋壓城頭水照簷。
橘柚兩山香盡處，蒲荷十里淨相兼。
愁將久雨春無賴，別在明朝酒未厭。
甚欲去同三四友，鱸風更捲一江簾。

丁端叔送海錯以詩來用韻酬之

澤魚山豕各忘年，味可勝窮總所便。
堪笑荊梧相俎豆，遂令蠻觸自矛鋌。
食無誤蟹車同軌，貢不徵蚶澤漏泉。
我在窮山人迹罕，亦蒙惟錯饋甘鮮。

戊申臘桂陽喜雪

月不能明雨卻稀
山容野色夜輝輝
清霄下際雙瓊闕
仙仗前驅萬玉妃
亘古嶺旁冬不到
從今湖外歲無饑
來年此日吾何適
蓑笠寒江一釣磯

遊南嶽

天作之山曷為哉
遙知閭闔正南開
兩川文武長江下
百粵車書五嶺來
柴望久為周墜典
牢愁多見楚遺才
不知崧岱還何似
我欲將書寄雁回

登祝融峰喜霽

仰止扶藜鬢髮蒼
恰當風雨暗
三湘為誰一闢天
無際及我重來日
未央江過數州多
曲折山緣長
畝半青黃
老僧耐得從頭問
問到吳門竟渺茫

和沈帥持要張漕季長韻

欲杭一葦近聲光
恨不先期燕子涼
舊學甘盤聊此日
倦遊司馬尚他鄉
別從滄海山橫斗
來自岷峨水濫觴
不謂偶成三楚客
得為蘭杜附諸香

登祝融峰觀日出

星月凋零萬象昏誰能先我見朝暾東南已得乾坤正
蠻觸方知夜旦分但覺滄溟浮佛屋卻忘衡嶽近天閭
迢迢下憩山腰寺人世浮雲尚吐吞

喜雨

天顧于人略有情片時收盡越山青老農望外扶犁立
倦客愁邊擁被聽塵翳欲清閭闔道井花已上轆轤亭
冥冥直待黃梅熟未要風池看約萍

除夜宿處州天寧寺

人言老去不如初我愛初心老轉無懶向門前題鬱壘
喜從人後飲屠蘇杯盤甚簡眠須早禮數多寬拜要扶
况復齟齬僧紙帳雞人不聽禁庭呼

已未上巳清明

霖霖故作落花天佳節重重倍悵然雖有庭除臨曲水
更無尊俎試新烟醑醺雅欲延春賞杜宇還能破晝眠
賴得二昆同一客巖茅蒲筍短檠邊

挽尤延之尚書

留宿江湖長孫子行藏節節耐人看
及為侍從身垂老
欲試平生事轉難
書就僅題前太史功成方記舊甘盤
令人長恨經綸意歷事三朝見一斑

和丁少詹

明月隋珠忽墮前
坐令衰颯意飄然
無端太史頭搶地
安得揚雄賦上天
前輩門牆餘幾在
他時竹帛竟誰傳
落花流水君愁不
南渡于今六十年

楊伯子持其尊人誠齋南海集為贈以詩奉酬

得與門牆最不遲
白頭方誦嶺南詩
文從嘉祐今三變
人在廬陵此一時
細數儒先能幾見
獨憐歲晚欲何之
瀟湘直下長江去
得望蓬萊卻更疑

送辛卿幼安帥閩

長才自昔恨平時
三入修門兩鬢絲
笈下可能長夜飲
花間卻學晚唐詞
潛然北顧關河永
簡在西清日月遲
乘雁雙鳬滄海上
與君從此恐差池

幼安詞妙一世
而詩句不傳良

恨事
也

重陽日寄瑞安劉宰宰以是日宴新第人

落帽沾衣總失真追隨萸菊亦勞神
酒無肴核依然好家有溪山豈是貧
沆瀣從空來夜氣青冥隨處際秋旻
不知此是登高否為問慈恩塔上人

上閩帥梁丞相生日二十二韻

炎正維中葉皇圖再造年天潢流少海
星緯粲台躔臣主嘗難並乾坤豈偶然
千齡開歷數一氣付陶甄黃屋

傳神器彤庭領衆仙風雲從此會日月更誰先昔者求
侵地何人賦甫田吳兒感抵掌噲等欲差肩廟論惟多
士戎功不在邊一麾分赤社萬事屬青編吾道誠難用
諸儒亦自偏才名多濩落經術失拘攣洛蜀何嗟及熙
豐竟禍延荀羅無雁鷺平步忽貂蟬甚矣知當宁淒其
望濟川年來羣老去公在萬民縣定作鹽梅夢行歌杖
杜還滄溟宗柱石衡嶽倚蒼玄要使垂身後無為慰眼
前管絃無算爵桃李未央天魯燕雖堪頌閩山不足鐫

中原康濟事彝鼎願聯翩

方信孺

字孚若興化軍人未冠能文周必大楊萬里見而異之用父蔭補番禺縣尉會韓侂胄啟邊釁上意尋悔金亦厭兵乃遣韓元靚來使缺命使往報難其人近臣薦信孺可使自蕭山丞召赴都假密院參謀官持督帥張巖書通問金廷金帥止于獄中露刃環守之絕其薪水要以五字信孺見左丞相完顏宗浩持辨益力宗浩授以報書而還時年三十仕途偃蹇屢起屢躓自放於詩酒以終

題龍隱巖

春波飽微綠斗柄涵空明
方舟貫巖腹鷺鶴相酬鳴仰

窺穹窿頂宛轉百怪呈僅餘鱗甲碎不見頭角獐不闖
清泠淵演迤萬頃澄但同魚鳥參勿遣蛟龍驚挾苔撫
竒篆倚權看題名三將標殊勲自與山不傾誰歟贅小
築正恐山靈嗔南澗更幽絕仙佛依崢嶸太虛可為室
豈復資欒楹乳泉助茗椀中有冰雪清何須驂鸞去此
即白玉京鼎來不速客抱琴忽遲迎愛此無絃曲巖溜
同一聲為君洗塵耳喚我詩魂醒祇愁白衣到好句無
繇成

桂州黃潭舜祠

西風攪桂樹落日明楓林遊子懷歸期余悲渺登臨虞
山一何高湘水一何深英皇僅枯冢寂寞熏兮琴我欲
奏古曲俗耳便哇淫古器不可見聊作相思吟相思長
相思相思無古今一歌衆鳥聽再歌萬籟瘖推手君勿
歌有酒且孤斟落落地此時意寥寥千載心五絃毋庸絕
四海誰知音

龍隱即事

石門元不鎖巖屋本無基
九夏花猶在千年樹倒垂
僧閒方定起客到每歸遲
甚欲眠蓬葉沿崖續斷碑

玩珠巖

歸舟多載小江春
重訪東巖舊履痕
揷水峭崖猶有路
垂天怪石本無根
金華仙伯真知己
薏苡將軍足斷魂
安得北山公可作
倩渠移取向家園

山行

二首

愛山那惜走千回
生怕前驅後騎催
石上參差鱗甲動

眼中在處畫圖開
驂鸞未辨乘風去
浮鷁何妨載雨來
人事百年俱變滅
祇應題字不塵埃

雨脚初收魚尾霞
滿溪流水平溪花
尋源曾識武陵洞
泛宅如浮茗雪家
但得嵌空元有路
何如峭絕不容車
道人辛苦經雲水
成塔從來是劫沙

遊中隱巖至新洞作

尋徧洞天三十六
蒼靈獨秘此巖扉
旋除野草鉏新逕
遮莫寒藤刺客衣
歲月偶同題壁字
煙霞似不放人歸

把茅欲作開山主已落瞿曇第二機

呂聲之

字太亨新昌人寧宗朝與陳君舉蔡行之在師友間皆以學行著用恩授平陽丞轉節度推官有沃

州雁

山草

題南巖寺

誰把長竿釣巨魚至今蹲石倚空虛蜂房愛向山厓結
鳥跡疑從海島居入座翠嵐生晝寂夾川紅樹照春餘
任公此去三千載為看芳碑一嘅吁

寄太湖黃縣尉

立頃談餘袂輒分
乖離數數異朋羣
君如天揭行空日
我亦風吹過嶺雲
不許范張同飯黍
空慙李杜共論文
睽違動涉經年裏
碁壘詩壇要策勲

舒城道中

還轅天作十分晴
瀉出秋光一派清
走筆欲題人到跡
揚鞭不住馬嘶聲
頃禾晚熟黃雲色
籬菊朝含白露英
得似淵明便歸去
候門童稚出歡迎

重陽桐城道中

萬古長淮一帶流從來戰地不容休
間關千里軍前餉牢落重陽客裏秋
悵望白衣來送酒了無黃菊與簪頭
何人早斷樓蘭首試解君王宵旰憂

西寺留題

白石孤雲自在閒紅塵一事不相關
寺遮翠靄青蘿外人到落花流水閒
欲取錦囊收勝槩慚無玉帶鎮名山
白蓮喜結當年社未厭朝來暮便還

題龍翔觀

曾到龍翔不記年
兩峰巍壓水中天
潮生潮落青蕪外
人去人來白鷺邊
四接遠遊僧萬笠
重新舊觀屋千椽
東南送目秋無際
隔岬人家問釣船

桂花

獨占三秋壓衆芳
何誇橘綠與橙黃
自從分下月中種
果若飄來天際香
清影不嫌秋露白
新叢偏帶晚煙蒼
高枝已斷卻生手
萬斛奇芬貯錦囊



宋元詩會卷四十四

欽定四庫全書

集部

宋元詩會卷四十五

詳校官中書_臣陸湘

主事銜_臣徐以坤覆勘

總校官知縣_臣繆琪

校對官中書_臣牛稔文

謄錄監生_臣任應銑

欽定四庫全書

宋元詩會卷四十五

兵部主事陳焯編

趙蕃

李昌父其先鄭州人祖暘以祕書少監提點信州
治坑因僑居玉山蕃用賜恩補州文學為太和主
簿受知于楊萬里調辰州司理與郡守爭獄罷官
人服其直始蕃受學於劉清之劉守衡州蕃乃求
監安仁酒庫及至衡而清之罷蕃即丐祠從清之
歸其於師友之際如此理宗即位屢召不赴以直
祕閣致仕卒年八十七平生與人樂易而持已剛
介不苟丞相周必大與蕃夙契屢加引薦竟不受

劉宰嘗歎曰舊家典型歸
然獨存者蓄一人而已

小園早作

今朝欣雨止天氣漸柔和
籬落小桃破階除馴雀多
占方移果樹帶土濯蔬科
農務侵尋及吾寧久卧疴

分界鋪愛直驛張安道
因杉製名而驛之前有老
梅一株不知安道何為捨
彼而取此也

杉自誰人種梅從何代栽
腹空雷故擊根瘦土無培
要是百年物曾經幾客來
直哉雖見錄清矣可遺材

送王子遵赴衡陽丞

王郎妙人物獨步向江東昔尉既不醉今丞寧肯聾相
依唇齒國忽去馬牛風清絕官曹外何年著我同

螢火

渾忘生朽質直擬暮光輝解燭書幃靜能添列宿稀當
風方自表帶雨忽成微變滅多無理榮枯會一歸

上已

朝來一雨快陰晴東郊百鳥間關鳴受風柳條不自惜

蘸水桃花可憐生不見山陰蘭亭集況是長安麗人行
東西南北俱爲客且送江頭返照明

劉過

字改之爲辛稼軒客其詞能
倣辛體而詩則別有會心

過京口放歌

金焦兩山相對起不盡中流大江水一樓坐斷天中央
收拾淮南數千里西風把酒閒來遊木葉漸脫人間秋
關河景物異南北神京不見雙淚流君不見王勃詞華

能蓋世當時未遇庸人耳
翩然落拓豫章遊滕王閣中
悲帝子又不見李白才思真
天人時人不省爲謫僊一
朝放迹金陵去鳳凰臺上望
長安我今四海遊將遍東
歷蘇杭西漢沔第一江山最
上頭天地無人獨登覽樓
高意遠愁緒多樓乎樓乎
奈爾何安得李白與王勃
名與此樓長哭兀

舟中

扁舟上灘風怒惡舟入深溪
雪花落我行無事有底忙

且向荻花深處著鄰船
乞火炮蛤蜊樽中濁醪
把一卮
陶陶萬事不復理
凍口且吐酸寒詩

遊石山

信步作幽計有菴如此深
佛燈明老屋秋日淡疎林
栢樹祖師意松楸老子心
十年棄鄉井灑淚一悲吟

弔張魏公

背水未成韓信陣
明星已隕武侯軍
平生一點不平氣
化作祝融峰上雲

樓鑰

字大防明州鄞縣人隆興元年試南宮考官胡銓稱之曰此翰林才也試教官調温州教授召入出知温州光宗嗣位召對除考功郎擢中舍代言得體繳奏無所迴避上嚴憚之光宗內禪詔出鑰手一時傳誦朱熹以論事忤韓侂胄罷職鑰力爭之趙汝愚曰樓公當今人物也遷吏尚俄以顯謨閣學士提舉江州侂胄誅還吏尚兼侍講年過七十精敏絕人除資政殿學士進大學士薨謚宣獻

題孟東野聽琴圖因次其韻

誰歟住前溪夜深清琴鳴天高豪氣肅月斜映疎星橡
林助蕭瑟泉聲激琮琤彈者人定佳能使東野聽東帶

不立朝遙夜甘空庭龍眠發妙思神交窮杳冥不見彈
琴人畫出琴外聲郊寒凜如對作詩太瘦生恨不從之
遊撫卷空含情

跋汪季路所藏修禊序

永和歲癸丑羣賢會蘭亭流觴各賦詩風流見丹青右
軍草禊序文采燦日星選文乃見遺至今恨昭明字畫
最得意自言勝平生七傳到永師襲藏過金籙辯才尤
秘重名已徹天庭屢詔不肯獻託言墮戎兵妙選蕭御

史微服山陰行譎詭殆萬狀徑取歸神京辯才恍如失
何異勅六丁文皇好已甚丁寧殉昭陵當時馮趙輩臨
寫賜公卿惟此定武本謂出歐率更採擇獨稱善遂以
鐫瑤瓊流傳迨五季皆在御寢扃耶律殘石晉睥睨不
知名意必希世寶韞裏載輜輶帝羝既北去棄與朽壤
并久乃遇知者龕置太守廳或云政宣間此石歸紹彭
又言入內府宣取恐違程焚膏繼短晷拓本手不停疊
紙至三四肥瘠遂異形南渡愈難見得者輒相矜汪侯

端明子嗜古自弱齡錦囊荷傾倒快覩喜失聲帶流乃
古天徃徃字不成而獨此全好護持如有靈元王號博
雅異論誰與評硬黃極摹寫唐人若無稱贗本滿東南
瑣瑣不足呈猶有藝與撫硃硃近璜珩右軍再三作已
覺不稱情心摹且手追安能效筆精響搨固近似形似
神不清不如叅其意到手隨縱橫

吳江舟中

阿連久矣共一被小別愁生無夜寐風帆將我上征途

回首江山日千里小舟橫卧吳江水夢回依約蕭齋裏
五更漏急月黃昏鳥散一聲人未起

石門洞

扁舟百里連城回青山中斷立兩崖清都虎豹隱不見
但見閭闔排雲開峰回失喜大飛瀑聲振萬壑驚春雷
掀髯目及九霄外玉虹千丈飛空來一冬青女斬天雪
不知聚此山之隈傳聞神龍卧其上寶藏擊碎真瓊瑰
胷中先自無塵埃到此更覺心崔嵬天風為我喚空翠

春水瀉入騷人懷謫僊曾來寫勝句劉郎又為開天台
我慚筆無挽牛力醉墨滿紙誰為裁或言龍湫更奇絕
佳山高處深雲顏我方攜筇往尋訪未知比此何如哉

跋李少裴修禊序

唐文皇之賜韓王有崔潤甫之題為可放若李重光
撥鐙書斷然無能效之者其為真筆何疑朱徐開皇
之記則已見少裴之辯開元去正觀未遠潤甫又職
校定四部圖書以為最善本則真善矣辯才之本既

殉昭陵今世止以定武本為第一又出歐陽率更所
臨石本自應在墨蹟之下則知此本信為冠絕蓋希
代寶也然考之新舊唐史崔湜弟液滌及從兄淮並
有文翰居清要液至殿中侍御史液弟滌明皇用為
秘書監出入禁中後賜名澄如此則液為湜之親弟
而為秘書監者滌也又宰相世系表博陵安平崔氏
仁師相太宗高宗次子擢擢之子液吏部員外郎第
四子挹挹之子湜相中宗湜之弟滌秘書監如此則

液為湜之從弟又不為秘書監傳之與表已自不同而滌之親筆乃爾以是知作史與考古之難也因併述之乃賦長句以副少裴好古之意

蘭亭修禊永和中羣賢高會俱雍容右軍作序亦偶爾
蒙草乃致傳無窮自言疑若有神助他日屢書終不同
歷代傳寶在秘府尤其甚者唐太宗當時按取極心力
摹本一一賜羣公惟此真蹟最奇絕蕭梁開皇有遺踪
親御奎文賜元嘉龍蟠虎翥何其工辯才所取秘昭陵

此本一洗凡馬空崔家兄弟列清要誨子況復稱龜龍
圖書四部資校讐當時尚有正觀風自云此為最善本
永衡臣液題甚恭李王深得撥鐙法筆力絕勁雄江東
右軍以來皆妙筆名勝異代如相從病餘扶僂行埽松
李君攜來為發蒙平生多有舊墨本一見使我開心胸
摩挲歎息不自己至寶盍入明光宮隱居懷寶正不惡
異氣或能牛斗衝叩門客至勿傾倒恐有御史來乘驄
錢清王千里得王大令保母甄刻為賦長句

書家千載稱蘭亭蘭亭真蹟藏昭陵只今定本誇第一
正觀臨寫鐫瑤瓊黃閣岡下得寶墨古人燒輒堅於石
大令親書保母銘況是當時晉人刻輒雖破裂裂文多全
妙畫遠過蘭亭鐫其間曲水悲夫字駸駸欲度驂騑前
我家阿連縛虎手更得退堂方外友王君素出三槐家
參坐會文真耐久田丁初來獻小硯尋見津津若微溜
細看背刻晉獻之永和彷彿在旁右亟訪田家叩所從
始知墓崩隨意收大輓支牀得前段掀倒浮屠全尾首

字為十行行十二百十有七三字漏交螭方壺不復見
貞石摧藏松亦朽我得此碑喜不寐摩挲三歎歎未有
興寧甲子十四周更閱三年仍乙丑若非洞曉未來數
安知八百餘年後坡翁應未見此志金彈之銘何絕類
人知文章有暗合智者所見略相似二王遺蹤無所遺
誰知地下此段奇三君共為成勝事至寶呈露端有時
越山盤屈獻與義付與兒孫世守之煩君更為護幽竈
或恐意如猶有知

徐淵子

號竹隱天台人有詩名與戴復古同里復古
初從徐學詩再登陸放翁之門其淵源如此

九日

衰容不似秋容好坐上誰憐老
孟嘉牢裹烏紗莫吹却
免教白髮見黃花

買硯

俸餘擬辦買山錢却買端州古硯
孰依舊被他驅使在
買山之事定何年

戴復古

字式之天台黃巖人父號東臯子工詩見前復古奉遺言收拾殘稿遂刻苦聲律繼以詩名東南名山川遊歷幾徧歸老委羽之下所居南塘有石屏遂以自號焉

求先人墨蹟呈表兄黃季文

我翁本詩僊遊戲滄海上引手掣鯨鯢失脚墮塵網身窮道則腴年高氣彌壯平生無長物飲盡千斛釀傳家古錦囊自作金玉想篇章久零落人間眇餘響按求二十年痛淚濕黃壤君家圖書府墨色照青嶂我翁有遺

迹數紙古田樣髣髴鍾王體吟句更豪放把玩竹林間
風寒凜悽愴昂昂野鶴姿愧無中散狀兒孤襁褓中家
隨風掃蕩於茲見筆法可想翁無恙幽居寂寞鄉風月
共來往衆醜成獨妍羣瘖怪孤唱一生既蹉跎人琴遂
俱喪託君名不朽斯文豈天相舊作忽新傳識者動慨
賞嗟予忝厥嗣朝夕愧俯仰敢墜顯揚思幽光發草莽
假此見諸公丐銘松栢壙君其啟惠心慰彼九泉望

夢中亦役役

半夜羣動息五更百夢殘天雞啼一聲萬枕不遑安一日一百刻能得幾刻閒當其閒睡時作夢更多端窮者夢富貴達者夢神僊夢中亦役役人生良鮮歡

答婦詞

舊嘗和彥先婦答夫二首故復賦此篇

江山阻且長矯首鄉關隔空閨泣幼婦顛顛失顏色隱閨鸛鳴篇寄彼西飛翼剝封覽情素既喜復悽惻別時梅始花傷今食梅實覽古帝王州結交遊俠窟千金沽美酒一飲連十日春風吹酒醒始知身是客杜宇啼一

聲行人淚橫臆衣破誰與紉髮垢孰與櫛勿謂遊子心
而不念家室新交握臂行肝膽猶楚越醜婦隔江山千
里情弗絕慙慙揮報章歸計何時決今夕知何夕睹此
纖纖月此月再圓時門前候歸一作轍車

大熱三首

天地一大窯陽炭烹六月萬物此陶鎔人何怨炎熱君
看百穀秋亦自暑中結田水沸如湯背汗濕如潑農夫
方夏耘安坐吾敢食

大渴遇甘泉汲多井欲竭入喉化為汗不救胸中熱吾
聞三危露迥與衆水別其色瑩琉璃其冷勝冰雪安得
一杯來為我解此渴

天嗔吾面白晒作鐵色深天能黑我面豈能黑我心我
心有冰雪不受暑氣侵推去北窗枕思鼓南風琴千古
叫虞舜遺我以好音

祝二嚴

僕本山野人漁樵共居處小年學父詩用心亦良苦搯

索空虛腹綴緝艱辛語糊口走四方白頭無伴侶前年
得嚴粲今年得嚴羽我自得二嚴牛鐸諧鍾呂粲也苦
吟身束之以簪組遍叅百家體終乃師杜甫羽也天姿
高不肯事科舉風雅與騷些歷歷在肺腑持論傷太高
與世或齟齬長歌激古風自立一門戶二嚴我所敬二
嚴亦我與我老歸故山殘年能幾許平生五百篇無人
為之主零落天地間未必是塵土再拜祝二嚴為我收
拾取

頻酌淮河水

有客遊濠梁頻酌淮河水東南水多鹹不知此水美春
風吹綠波鬱鬱中原氣莫向北岼汲恐有英雄淚

元宵雨

窮人不謀歡元夜如常時晴雨均寂寞早與一睡期朱
門粲燈火歌舞臨酒池酒闌歡不足九街恣遊嬉前呼
驚市人簫鼓逐後隨片雲頭上黑翻得失意歸

琵琶行

潯陽江頭秋月明黃蘆葉底秋風聲銀龍行酒送歸客
丈夫不為兒女情隔船琵琶自愁思何預江州司馬事
為渠感激作歌行一寫六百六十字白樂天白樂天平
生多為達者語到此胡為不釋然弗堪謫宦便歸去廬
山政接柴桑路不尋黃菊伴淵明忍泣青衫對商婦

伏龍山民宋正甫湖山清隱廼唐山人陳陶故圃

曾景建作記俾僕賦詩

故人昔住金華峰面帶雙溪秋水容故人今住伏龍山

陳陶故園茆三間千載清風徐孺子門前共此一湖水
百花洲上萬垂楊白鷗羣裏歌滄浪故人心事孺子高
故人詩句今陳陶短衣飯牛不逢堯何如繡鞍上著錦
宮袍瓦盆對客酌松醪何如紫霞觴泛碧葡萄且萸然
火度寒宵何如玉堂夜照金蓮膏吟成秃筆寫芭蕉何
如沈香亭北醉揮毫再三問君君不對目送飛鴻楚天
外細讀山中招隱篇超然意與烟霞會照影湖邊雙鬢
皓此計知之悔不早三椽可辦願卜隣荷鋤相隨種瑶

草

詰燕

去年汝來巢我屋梁間
汙泥高一尺啄腥拋穢不汝厭
生長羣雛我護惜家貧惠愛不及人
自謂于汝獨有力
不望汝如靈蛇銜寶珠
雀獻金環來報德
春風期汝一
相顧對語茅簷慰岑寂
如何今年來於我絕蹤跡
一貪簾幕畫堂間
便視吾廬為棄物

寄趙鼎臣

學如劉子政不使校書天祿閣文如李太白不使待詔
金鑾殿倚樓終日看廬山贏得虛名聞九縣才忌太高
心忌太清平平穩穩為公為卿騏驎可羈乃歸帝閑麟
鳳莫馴為瑞人間人為瑞徒能好騏驎可羈終遠到
歲寒心事幾人知手把梅花供一笑

秋懷

紅葉無人掃黃花獨自妍聽談天下事愁到酒樽前水
濶終非海樓高不到天昔人已懷古况復後千年

水陸寺

長沙沙上寺突兀古樓臺四面水光合一邊山影來靜
分僧榻坐晚趣釣船回明日重相約前村訪早梅

歲暮呈真翰林

歲事朝朝迫家書字字愁頻沽深巷酒獨倚異鄉樓詩
骨梅花瘦歸心江水流狂談渺無際忍看大刀頭

淮上春日

邊寒客衣薄漸喜暖風回社後未聞燕春深方見梅壯

懷頻撫劍孤憤強銜杯北望山河語天時不再來

題張簽判園林

園圃屋東西從君一杖藜雨寒花蕊瘦春重柳絲低
亭館常留客軒窗總傍溪摩挲雪色壁安得好詩題

劉興伯黃希宋蘇希亮慧力寺避暑

何處避炎熱相期過寶坊萬松深處坐六月午時涼
鐘磬出深屋江山界短牆醉來歸興懶留宿贊公房

黃道士出文

林屋何瀟灑權為羽士家客來多載酒僧至自煎茶試
墨題新竹攜筇數落花飲中忙過日無暇問丹砂

陳伯可山亭

梯險登霞外乘流過竹西寒溪隨雨漲高閣與雲齊雙
鶴有時舞孤猿何處啼清吟無盡興白石可留題

沈莊可號菊花山人即其所言

老貌非前日清吟似舊時已無藏酒婦幸有讀書兒連
歲修茆屋三秋繞菊籬寒儒有奇遇太守為刊詩

訪陳與機縣尉于湘潭下攝市

清談守風節當官若隱居自稱為漫尉人道是迂儒俸
外無炊米公餘但讀書王門多貴戚道眼視如無

題趙庶可山臺

天造此一景超然闌闌間坐分臺上石看盡越中山松
月照今古樵風送往還只愁軒冕出閒却白雲關

姪淑遠遊不得書

客夢江湖遠窮居骨肉離尺書無寄處中夜不眠時念

爾衣裘薄滿懷風露悲狂遊斷消息深負竹林期

歸來兒子創小樓以安老者

老去知無用歸來得自如幾年眠客舍今日愛吾廬處
世無長策閒時讀故書但能營一飽渾莫問其餘

一笑

海曲荒涼地吟邊蹭蹬身時危法當隱年老慣居貧俗
客苦戀坐小孫癡弄人等閒成一笑不覺把杯頻

題姪孫豈潛家平遠圖

好山橫遠碧平野帶林塘四望耕桑地幾年雲水鄉
海
天龍上下秋日鶴翱翔覩物忽有感無心住草堂

舟中

艤櫂河梁畔推篷得句新雲為山態度水借月精神
密
樹藏飛翮平波見躍鱗饑年村落底也有醉歸人

送曉山夏官甫入京

歲月頻看鏡功名一據鞍勿言行路惡有志戀家難
芳
草客程遠落花春夜寒江湖舊時夢相逐到長安

辛丑歲暮

臘盡無多日吾生有幾年老于人事懶貧覺世情偏獨
枕江湖夢閉門風雪天三杯動詩興得句落梅邊

姪孫子淵新居落成

一區揚子宅中有讀書堂早覺儒風好兼看野趣長藩
籬帶花竹里巷接農桑安得茆三架為鄰住汝傍

雁山總題此山本朝方顯

幾山兼幾水更有幾烟霞不立倦人宅都為釋氏家賓

秋多少雁報曉一雙鴉有此山林勝如何在海涯

淨明

林巒相掩映巖谷獨玲瓏下置維摩室上通龍伯宮靈

珠四時雨秋水一簾風甚欲觀新月山高脚力窮

新月谷在

上高不可登

風雨無憀中覽鏡有感作小詩未有斷句適兩姪

孫攜詩卷來

覽鏡忽增感誰能寫我真峻嶒忍饑面蹭蹬苦吟身風

葉飄零夜雨花狼藉春相過慰牢落吾族有詩人

壬寅除夜

今夕知何夕滿堂燈燭光杜陵分歲了賈島祭詩忙橫
笛梅花老傳杯栢葉香明朝賀元日政恐雨相妨

送王仲彝制機宰瀏陽

一身供世用六月赴官忙當此炎天熱知君心地涼吏
能師卓魯縣界接瀟湘試飲瀏陽水清清滋味長

訪西澗王深道

諸王居處僻，古屋滿山坡。
傳到宋淳祐，來從晉永和。
詩書歷年久，名勝結交多。
一澗流芳潤，滔滔秋水波。

石洲遇陳季申話舊

綠樹挂烏帽，清波照白頭。
合隨秋燕去，那作賈胡留。
紅吐檳榔唾，香熏茉莉毬。
樽前話疇昔，一笑不能休。

夜吟呈趙東巖

汲泉漱殘酒，行吟到夜分。
一軒清似洗，萬籟寂無聞。
風送迎秋雨，天收翳月雲。
雞鳴庭戶白，人事又紛紛。

飲蕭和伯家醉登快閣和揚伯子題分明觀韻

醉歸蕭史宅快閣倚西東山歛過雲雨江無起浪風月
行銀漢上人在玉壺中天眼照塵世應憐鶴髮翁

吳門訪舊

去此十三秋重來雪滿頭鏡顏加老醜詩骨帶窮愁鳥
語新晴樹人尋舊倚樓藏春門下客一半落山丘

鄂州戎治靜憇亭

幽亭何處尋巖樹碧森森獨坐生雲石少安輕世心伴

人雙鶴立多事一蟬吟提劍翻然起中原秋草深

江上

江上維舟穩人間行路難數朝花雨細一夜社風寒燕
語能留客蛙鳴豈為官苦吟成底事贏得瘦團圞

上封

樓臺逼霄漢窻戶納雲霓回顧千巖路如登萬仞梯泉
從山頂出雪壓樹頭低高絕無人境非僧不可栖

世事

世事直如夢人生不肯閒利名雙轉轂今古一凭欄
春水渡旁渡夕陽山外山吟邊思小范共把此詩看

冬日移舟入峽避風

櫂入黃蘆浦驚飛白鷺羣霜華濃似雪水氣盛於雲
市遠炭增價天寒酒策勲同舟有佳士擁被共論文

光澤溪上

艤櫂西岳下舟人語夜闌風林無鳥宿石窟有龍蟠
月色連沙白灘聲入夢寒曉來新得句寄與故人看

趙景賢送荔枝

荔子固多種色香俱不同
新來嘗小綠又勝擘輕紅
大嚼思千樹分甘僅一籠
嘗觀蔡公譜夢想到莆中

得古梅兩枝

老幹百年久從教花事遲
似枯元不死因病反成奇
玉破稀疎藥苔封古怪枝
誰能知我意相對歲寒時

貧作負恩人為何宏甫作

九陌塵中事三生石上身
狂為好詩客貧作負恩人
十

載江村別扁舟塗水濱音書久不至得夢往來頻

濠州春日呈趙教授

體國

柳似眠初起梅雖老可觀冰開春水活風暖雪泥乾得
酒忘為客談詩不論官無人知此意一笑對黃冠

鄭南夫雲林隱居

一來陪勝踐再到惜蹉跎記得山中景行尋竹外坡天
寒梅信早海近鴈聲多煙渚蒲洲外時聞欸乃歌

見名園荒廢有感

喬木無留影殘花尚假妍
荒池蛙叫噪破屋燕周旋
富貴偏多事風流得幾年
墻東有寒士書種世相傳

題董侍郎山園

行盡芙蓉徑尋秋扣竹關
樓高納萬象木落見羣山
平野水雲際畫橋煙雨間
紅塵城下路只隔一湖灣

寄湖州楊伯子監丞

宛如公幹卧漳濱枕上窮
吟過一春遣病每懷詩卷
屬訪醫因問藥君臣
鑽龜小卜占災數覽鏡羸形
類別人

寄語雪川賢太守新詩莫厭話愁頻

梅

孤標粲粲壓羣葩獨占春風管歲華幾樹參差江上路
數枝裝點野人家冰池照影何須月雪岸聞香不見花
絕似林間隱君子自從幽處作生涯

寄復齋陳寺丞

豈說從來用處難出乘五馬看廬山鳳凰覽德下千仞
虎豹憎人上九關持論太高天動色憂時未老鬢先斑

平生風節誰其似
汲黯朱雲伯仲間

李季允侍郎舟中

憶昨楓橋既語離
何期千里又相隨
太湖不見鷗夷子
秋浦同尋杜牧之
燈火船窻深夜話
江山客路早冬詩
人間草木空無數
除却梅花莫我知

廬山

擁鼻行吟上下廊
今宵又宿贊公房
松搖半夜風聲壯
桂染中秋月色香
白石清泉聞笑語
名山大澤出文章

老夫甘作無名者不逐紛紛舉子忙

夜宿田家

簷笠相隨走路歧一春不換舊征衣
雨行山崦黃泥坂夜扣田家白板扉
身在亂蛙聲裏睡心從化蝶夢中歸
鄉書十寄九不達天北天南雁自飛

題何季湧江亭

勝槩何妨近市廛紅塵疎處著三椽
數重青嶂橫天末一道澄江在眼前
海浪浴紅朝出日樹林堆碧晚生烟

請君分付堤邊石莫使漁翁來繫船

思歸

吟詩不換校書郎但欲封侯管醉鄉
疎懶無成嵇叔夜清狂似達賀知章
安貧不怕黃金盡既老從教白髮長
百計不如歸去好子孫相對說農桑

長沙呈趙東巖運使併簡幕中楊唯叔通判諸文
日暮遠塗行未休白頭又作長沙遊
湘江一點不容俗岳麓四時皆是秋
香艸汀洲付騷客紅蓮幕府聚名流

吟邊萬象寫不得上有風流趙倚樓

諸葛仁叟縣丞極貧能保風節有權貴招之不屑

其行

時人誰識老聾丞滿口常談杜少陵俗輩衆多吾輩少
素交零落利交興權門炙手炎如火詩社投身冷似冰
堪笑老天無老眼相知賴有竹林僧

飲中

布衣肯換錦宮袍刺骨清寒氣自豪腹有別腸能貯酒

天生左手慣持螯
蠅隨驥尾宜千里
鶴在雞羣亦九臯
賢似屈平因獨醒
不禁顛顚賦離騷

癖習

平生癖習未全除
虛事驚心實事疎
為惜落花慵掃地
每看脩竹欲移居
逢人共作亡何飲
撥冗時觀未見書
爭奈一貧隨我在
思量不若把犁鉏

括蒼石門瀑布

少泊石門觀瀑布
明知是水却疑非
亂拋雪玉從天下

散作雲煙到地飛
夜聽蕭蕭洗塵夢
風吹細細濕人衣
謝公蠟屐經行處
聞有留題在翠微

滕王閣次韻劉允叔

消遣客愁尋勝事
酒杯詩卷得同攜
當年傑閣棲龍子
今日空梁落燕泥
斜照浴紅秋水好
山橫碧畫欄西
幾人登覽皆磨滅
唯有前峰壓不低

竹洲諸姪孫小集永嘉蔣子高有詩次韻

美景能兼樂事難
愁來唯仗酒遮攔
昂藏病骨兼詩瘦

料峭春風帶臘寒
喬木尚疑前輩在
好花應笑老人看
忍拋明月先歸去
輸與諸郎徹夜歡

思歸

躬耕海上奈無田
乍可經營買釣船
未有人供令狐米
欲從鬼借尉遲錢
回頭歸路三千里
藉手還鄉五百篇
幸遇太平時節好
白雲深處了殘年

遇張韓伯說邊事

每上高樓欲斷魂
沿江市井幾家存
飛鴻歷歷傳邊信

芳草青青補燒痕北望苦無多世界南來別是一乾坤
相逢莫說傷心事且把霜螯薦酒樽

聞時事

昨報王師奏凱還近聞北顧一時寬淮西勲業歸裴度
江右聲名屬謝安夜雨忽晴看月好春風漸老惜花殘
事關氣數君知否麥到秋時天又寒

靈洲梅花

穿林傍水幾平章合有春風到草堂自入冬來多是暖

無尋花處却聞香
枝南枝北一輪月
山後山前兩履霜
直看過年開未了
醉吟且放老夫狂

湖廣李漕革夫大卿飲客西湘

湘亦作湖

管領風光此會稀
坐中賓客總能詩
神仙有洞人難見
山水當軒看轉奇
春不再生陶侃栢
人來多打李邕碑
因思屈賈傷今古
國有忠臣無用時

江行

借得茅樓一倚欄
見成詩句滿江天
歸鴉啼處客投宿

野鴨飛邊人上船老眼尚嫌隨物轉閒心可惜被貧牽

平生錯做功名夢金印何如一

一作須

二頃賢

京口遇薛野鶴

天下江山第一州可能無地著詩流黃金不愛買官職
白髮猶堪上酒樓懊恨牡丹遭雨厄叮嚀芍藥為春留
狂吟有禁風騷歇語燕啼鶯代唱酬

秋日病餘

桂子吹香風露深老夫吟了聽蟬吟秋來賸有行山興

病後全無涉世心
詩苦積成雙白髮
酒豪輕用萬黃金
平生意氣今如許
獨抱傳家一破琴

黃州竹樓呈謝國正

每日黃堂事了時
一心惟恐上樓遲
發揮天地讀周易
管領江山歌杜詩
切戒吏來呈簿歷
常邀客至共琴碁
風流太守誰其似
半似元之半牧之

家居復有江湖之興

寒儒家舍只尋常
破紙窻邊折竹牀
接物罕逢人可語

尋春多被雨相妨
庭垂竹葉因思酒室有蘭花不炷香
到底閉門非我事
白鷗心性五湖傍

杜仲高相遇約李尉

胃中無地著塵埃
有手唯堪把酒杯
苦恨好山移不得
生憎俗客去還來
秋風吹老東籬菊
春信攙開北嶺梅
管領風光須我輩
急吹短笛櫂船回

送別朱兼僉

恰喜相逢又語離
愁于江上送君時
清談未了風吹斷

白髮可憐天不知
樗木自肥傷竹瘦
海棠偷放笑梅遲
黃堂若問癡頑老
新有登樓十二詩

新安寒食

不擬今年到歙州
要知行止豈人謀
一百五日客懷惡
三十六峰春雨愁
老矣此身猶道路
淒其歸夢繞松楸
花瓢仙子無由見
千里江山負遠遊

鄂渚煙波亭

倚徧南樓更鶴樓
小亭瀟洒最宜秋
接天煙浪來三峽

隔岸樓臺又一州豪傑不生機事息古今無盡大江流
凭欄日暮懷鄉國崔顥詩中舊日愁

湘中遇翁靈舒

天台山與雁山隣只隔中間一片雲一片雲邊不相識
三千里外却逢君

釣臺

萬事無心一釣竿三公不換此江山平生誤識劉文叔
惹起虛名滿世間

寄後村劉潛夫

朝廷不召李功甫
翰苑不著劉潛夫
天下文章無用處
奎星夜夜照江湖

宋元詩會卷四十五